

## NAQQIUT

Matuma inatsisissatut siunnersuut 21. august 2015-imersoq aamma inatsisissamut oqaaseqaatit 21. august 2015-imeersut taarserpaa.

(§§ 1, 5, 15, 17, 18, 19, 20, 26 27-mi teknikkikkut oqaatsitigullu erseqqissaavigineqarput)

**Siunnersuut uunga: Utoqqalinersiaqarneq pillugu Inatsisartut inatsisaat nr. xx, xx.xx-meersoq**

**Kapitali 1**

*Piumasaqaatit nalinginnaasut il.il.*

§ 1. 65-inik ukioqalernermi utoqqalinersiaqalerfiuvoq, taamaattoq tak. imm. 2-4.

*Imm. 2.* 1. januar 2017-imiit utoqqalinersiaqalernermi ukioritinneqartut 66-inut qaffanneqassapput. Taamaattoq kommunalbestyrelsi qinnuteqaateqareernerup kingornagut aalajangiisinaavoq utoqqalinersiaqalernermit ukiorititaasut aatsaat 1. januar 2021-imi 66-inik ukioqalernermit qaffanneqassasut inuk minnerpaamik ukiuni 35-ini sulerulunnerup kinguneranik timikkut imaluunniit tarnikkut nungullarsimappat.

*Imm. 3.* 1. januar 2021-miit utoqqalinersiaqalernermi ukioritinneqartut 67-inut qaffanneqassapput. Taamaattoq kommunalbestyrelsi qinnuteqaateqareernerup kingornagut aalajangiisinaavoq utoqqalinersiaqalernermit ukiorititaasut aatsaat 1. januar 2025-imi 67-inik ukioqalernermit qaffanneqassasut inuk minnerpaamik ukiuni 35-ini sulerulunnerup kinguneranik timikkut imaluunniit tarnikkut nungullarsimappat.

*Imm. 4.* Utoqqalinersiaqalernermi ukiorititanut imm. 2 aamma 3 malillugu qaffaanissamut kinguartitsineq pillugu Naalakkersuisut malittarisassanik ersarinnerusunik aalajangersaassapput.

*Imm. 5.* Inuit utoqqalinersiaqartinneqareersut utoqqalinersiaqarsinnaatitaanertik annaasannngilaat, imm. 2-3 malillugu utoqqalinersiaqarnermi ukiorititanut piumasaqaatit naammassineqarsinnaajunnaaraluartut.

§ 2. Utoqqalinersiaqarnissamut piumasaqaataavoq qinnuteqartoq danskisut innuttaasuseqarnissaa.

*Imm. 2.* Taamaattoq imm. 1 malillugu danskisut innuttaasuseqarnissaaq atuutissannngilaq:

- 1) Inunnut Isumaginninnikkut isumannaallisaaneq pillugu Nunat Avannarliit isumaqatigiisutaannut ilaasunut, imaluunniit
- 2) Inunnut qinnuteqarnerup siunitsianngua sivikinnerpaamik ukiuni pingasuni Kalaallit Nunaani aalajangersimasumik najugaqarsimasunut.

*Imm. 3.* Utoqqalinersiaqarsinnaanerup atuutilerfiata kingorna utoqqalinersiaqalernissamik qinnuteqartoqarpat, ukiumi utoqqalinersiaqarnissamik qinnuteqartup pisinnaatitaalerfiani najugaqarsimanissamik piumasaqaat eqquutsinneqarsimassaaq.

§ 3. Utoqqalinersiaqarnissamut piumasaqaataavoq qinnuteqartoq Kalaallit Nunaanni, Nunat Avannarliit arlaanni imaluunniit nunami EØS-ip isumaqatigiissutaanik akuersisimasumi aalajangersimasumik najugaqartuunissaa.

§ 4. Utoqqalinersiaqarnissamut piumasaqaataavoq 15-inik ukioqalernerup ukiumilu utoqqalinersiaqalerfiusup akornanni sivikinnerpaamik ukiuni pingasuni Kalaallit Nunaanni, Qallunaat Nunaanni imaluunniit Savalimmiuni aalajangersimasumik najugaqarsimanissaq.

§ 5. Inatsisartut inatsisaanni matumani aapparisaq naatsorsuunneqartoq tassaavoq utoqqalinersiallip katissimallugu aapparisaa, nalunaarsukkamik aapparisaa, imaluunniit katissimaner-mut assingusumik sivikinnerpaamik ukiumi ataatsimi aapparisimasaa.

*Imm. 2.* Utoqqalinersiallit appaqartut utoqqalinersianut tapeqassapput utoqqalinersialimmut kisimiittumut tunniunneqartunut annertussuseqartumik, utoqqalinersialik aapparisaatalu isertitaat maanna atuuttut ukiumut katillugit ilanngaattissat ilanngunnagit kr. 200.000-t ataallugit akileraarutaasussanik isertitaqarpata. Utoqqalinersianut tapeq utoqqalinersiallip aappaatalu isertitaanit toqqammavigineqartunit 53 pct-imik appartinneqassaaq kr. 83.000-inik ilanngaaserlugit.

*Imm. 3.* Aappaasoq isumaginninnerup iluani ulloq unnuarlu angerlarsimaffimmut aalajangersimasumik najugalittut nuuppat, utoqqalinersiaqartoq kisimiittutut isigineqassaaq.

## **Kapitali 2**

### *Utoqqalinersiaqarsinnaanngorneq katersisarnerlu*

#### *Utoqqalinersiaqalersarneq*

§ 6. Utoqqalinersiaqalersitsisoqarsinnaavoq utoqqalinersiaqalernissamik qinnuteqareernerup kingorna qaammatip aallaqqaataani, aammalu utoqqalinersiaqarnissamut piumasaqaatit naammassineqarsimappata.

*Imm. 2.* Utoqqalinersianik pisinnaatitaanerup kingorna utoqqalinersiaqalernissamik qinnuteqarnermi, ulloq qinnuteqarfiusup kingorna qaammatip tulliuttup aallaqqaataa aallarnerfigalugu utoqqalinersiaqarsinnaatitaaneq atuutilissaaq.

*Imm. 3.* Siusinaartumik pensionisiallit qinnuteqaatitaqanngitsumik utoqqalinersiaqarnermut ikaarsaartassapput, Inatsisartut inatsisaanni matumani utoqqalinersiaqalernissamut ukioqalernerneq anguneqaraangat.

#### *Katersineq*

§ 7. Tamakkiisumik utoqqalinersiaqarsinnaatitaanermut piumasaqaataavoq 15-inik ukioqalernerup aamma utoqqalinersiaqalernermi ukiussaritinneqartut akornanni Kalaallit Nunaanni, Qallunaat Nunaanni imaluunniit Savalimmiuni sivikinnerpaamik ukiuni 40-ni aalajangersimasumik najugaqarsimanissaq.

*Imm. 2.* Tamakkiisumik utoqqalinersiaqarsinnaatitaanermut imm. 1-imi piumasaaqat naammassineqarsimangippat, piffissap aalajangersimasumik najugaqarfigisimasap ukiuinut ilivitsunut kingumut akunnaallilerlugu naatsorsornera, aamma ukiunut 40-nut naleqqiullugu naatsorsornera najoqqutaralugit, utoqqalinersiassanik annertussusiliineq pisassaaq.

### **Kapitali 3**

#### *Utoqqalinersiat aningaasartaat*

**§ 8.** Utoqqalinersiat toqqammaviusumik aningaasartaqarput aamma utoqqalinersianut tapeqarluni.

**§ 9.** Toqqammaviusumik aningaasartat ukiumut kr. 58.000-t tikillugit annertussuseqarput.

*Imm. 2.* Toqqammaviusumik aningaasartat ilanngaateqassapput, utoqqalinersiaqartup ukiuumut isertitai maanna atuuttut ilanngaatisat ilanngunnagit akileraarutaasussat, utoqqalinersiat aamma Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu utoqqalinersiat ilanngunnagit, kr. 216.000 qaangerneqarsimappata.

*Imm. 3.* Toqqammaviusumik aningaasartat millisinneqassapput isertitai tunngavigineqartunit 50 pct-ianik, tak. imm. 2, kr. 216.000 ilanngaatilugit.

**§ 10.** Utoqqalinersianut tapeq kisimiittumut ukiumut kr. 72.000 angullugu annertussuseqarpoq, utoqqalinersiaqartumut aappaqartumut kr. 40.000 angullugu annertussuseqarpoq, tak. § 5.

*Imm. 2.* Toqqammaviusumik tapeq ilanngunnagu, aamma Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat naapertorlugu utoqqalinersiaat ilanngunnagit, utoqqalinersianut tapeq ilanngaateqassaaq utoqqalinersiaqartup aappaqarpallu ukiumut isertitai akileraarutaasussat maanna atuuttut ilanngaatisat ilanngunnagit katillugit ukunanga qaangiisimappata:

1) Utoqqalinersialimmut kisimiittumut kr. 56.000.

2) Utoqqalinersialimmut aappaqartumut kr. 83.000, tak. § 5.

*Imm. 3.* Utoqqalinersianut tapeq ilanngaateqassaaq isertitai tunngavigineqartut 45 pct.-iannik, tak. imm. 2, kisimiittumut ilanngaatilugit kr. 56.000 aamma isertitai tunngavigineqartut 30 pct.-iannik utoqqalinersialimmut aappaqartumut ilanngaatilugit kr. 83.000, tak. § 5.

**§ 11.** Aningaasartat §§ 9-10-mi taaneqartut Kalaallit Nunaata Naatsorsueqqissaartarfiata akinik nalimmassaanermi nalunaarsuutai toqqammavigalugit nalimmassaavigineqartassapput. Toqqammaviusumik aningaasartat aamma utoqqalinersianut tapeq nalimmassaavigineqassapput akinik nalimmassaanermi nalunaarsuutit juulip aallaqqaataaneersut qaammatini 12-it iluanni kingullerni allannguutit naatsorsuinerit toqqammavigalugit. Nalimmassaaneq ukiumut ataasiarluni pisassaaq januaarip aallaqqaataa tullitut siulleq aallarnerfigalugu atuutilersineqartassalluni.

*Imm. 2.* Ukiut tamaasa januaarip aallaqqaataani aningaasartat nalimmassaavigineqartut Naalakkersuisunit pisortatigoortumik tamanut nalunaarutigineqartassapput.

#### **Kapitali 4**

##### *Utoqqalinersianik ukiumoortumik nalimmassaasarneq*

**§ 12.** Utoqqalinersiat ukiut tamaasa januaarip aallaqqaataani nalimmassarneqartassapput, tak. §§ 9-11.

*Imm. 2.* Utoqqalinersiat aningaasaqarnikkut pissutsini annertunerusumik allanngortoqartil-lugu ingerlaavartumik nalimmassaavigineqassapput, tak. §§ 9 aamma 10. Nalimmassaaneq allannguinermit qaammatip tulliuuttup ullua siulleq aallarnerfigalugu atuutilertassaaq.

#### **Kapitali 5**

##### *Paaqqinnittarfinni il.il. angerlarsimaffiup avataani inissisimaneq*

**§ 13.** Utoqqalinersiaqartoq paaqqinnittarfimmut il.il. angerlarsimaffiup avataanut inissin-neqarallarpat tassanilu najugaqarneq pisortanit akilersorneqarpat, aamma utoqqalinersiaqartoq pilersuisussaatitaaffeqarpat imaluunniit angerlarsimaffimmut aningaasartuuteqarpat, utoqqalinersiat allannguuteqassanngillat.

*Imm. 2.* Angerlarsimaffiup avataanut paaqqinnittarfimmut il.il. sivisunerusumik inissiisoqar-tillugu tassanilu najugaqarneq pisortanit akilersorneqarpat, qaammammi nuuffiusumi aamma qaammammi tulliuuttumi utoqqalinersiat allannguuteqassanngillat, tamatumalu kingorna utoq-qalinersiat toqqammaviusumik aningaasartaat 46 pct.-ii tunniunneqartassapput. Utoqqaliner-sianut tapeq tunniunneqartarpat qaammammi nuuffiusumi tulliuuttumilu atorunnaarsinneqas-saaq.

*Imm. 3.* Utoqqalinersialik inissinneqartoq, tak. imm. 1 aamma 2, aningaasaqarnermut imaluunniit innarluuteqarnermut aamma peqqiilliuuteqarnermut tapeqartinneqarsinnaavoq. Meeqqanut tapisiaqartoqartillugu taakkununga pisinnaatitaaffik allannguuteqassanngilaq.

*Imm. 4.* Utoqqalinersialik imm. 2 naapertorlugu angerlarsimaffigisami avataani inissisima-junnaarpat, qaammatip tulliuuttup aallaqqaataa aallarnerfigalugu utoqqalinersiat tunniunneqart-arneri nanginneqassapput.

*Imm. 5.* Angerlarsimaffiup avataani inissisimanermi utoqqalinersianik tunniussisarneq pil-lugu, ilaatigut paaqqinnittarfinni il.il. inissisimanermi utoqqalinersianit ilanngaassisarneq pil-lugu, kiisalu isumaginninnermi ulloq unnuarlu angerlarsimaffimmi inissinneqarnermi nammi-neq isertitaqarneq pissutigalugu akiliisarneq ilanngullugu Naalakkersuisut ersarinnerusumik aalajangersaassapput.

#### **Kapitali 6**

##### *Tapit*

##### *Meeqqanut tapit*

**§ 14.** Utoqqalinersialik meeqqanut 18-it inorlugit ukiulinnut pilersuisussaataaasoq meeqqat ataasiakkaarlugit tapisiaqaatigissavai. Tapit tunniunneqartassapput pilersuisussaataaneq toqqaannartumik pilersuinerunersoq imaluunniit meeqqanut akilersuutininik akiliisarnikkut eqquutsinneqarnerseq apeqqutaatinnagu.

*Imm. 2.* Pilersuisussaataaneq meeqqanut akilersuutininik akiliinikkut eqquutsinneqarpat, aningaasat akilersuutininik pisinnaatitaasumut toqqaannartumik tunniunneqassapput.

*Imm. 3.* Meeqqanut tapit meeqqamut toqqaannartumik tunniunneqarsinnaanngillat.

*Imm. 4.* Meeqqanut tapit qaammatikkaartumik tunniunneqartassapput, annertussusaat Inatsisartut aningaasaqarnermut inatsisaanni ukiumut nalinginnaasumik aalajangiiffiqineqartumi, taamaattoq tak. imm. 6.

*Imm. 5.* Pilersuisut tamarmik utoqqalinersiaqarpata, tamarmik immikkut meeqqat ataasiakkaarlugit tapisiaqaatigissavaat.

*Imm. 6.* Utoqqalinersiaqartoq meeqqanut akilersuutininik akilersuisussaataappat, allaaneruumik isumaqatigiissuteqartoqarsimatinnagu imaluunniit piffissami allaaneruumi akilersuunissaq aalajangiunneqarsimatinnagu, meeqqanut tapeq ukioq affakkaarlugi tunniunneqartassaaq. Meeqqanut akilersuutit ukiup affaanit sivikinneruumik siviluneruumilluunniit akilernerqarpata, piffissamut tassunga meeqqanut tapeq tamarmiusoq tunniunneqassaaq.

*Imm. 7.* Meeraasoq utoqqalinersiaqartumi najugaqanngippat, utoqqalinersiutilillu meeqqamut akilersuutininik akilersuisussaataappat, meeqqanut tapit meeqqanut akilersuutininik pisinnaatitaasumut tunniunneqassapput.

*Imm. 8.* Meeqqanut tapit utoqqalinersialimmuut Kalaallit Nunaata avataanut nunassissimasumut tunniunneqartussaanngillat.

**§ 15.** Meeqqanut tapit tunniunneqartarunnaassapput kinguliini patsisissaataaasoq ataaseq arlallilluunniit eqquutsinneqarpata:

- 1) Meeqqanik inuusuttunillu ikiorsiisarneq pillugu inatsisartut peqqussutaat malillugu meeraq angerlarsimaffiup avataanut inissinneqarsimappat imaluunniit pisortanit tamakkiisumik pilersorneqarpat,
- 2) Meerarineqartoq ilinniagaqarnerisutisiaqarpat, matumani aamma sulilluni sungiusarnerup nalaani tamatumunnga malittarisassat malillugit pisartagaqarpat,
- 3) Meerarineqartoq aapparminut, nalunaarsukkamik aapparminut meeqqamulluunniit nammineq pilersuisussaataalerpat.

*Innarluuteqarnermut aamma peqqiilliuuteqarnermut tapeq*

**§ 16.** Innarluuteqarnermut aamma peqqiilliuuteqarnermut tapit aningaasartuutininut makkununga tunngatillugit tunniunneqarsinnaapput:

- 1) Inunnut tarnimikkut imaluunniit timimikkut atuussinnaassutsimikkut sannginnerulersimasunut ikiorsiissutitut.
- 2) Peqqissutsikkut pisariaqartitat malitsigisaanik annertuumik aningaasartuuteqarnermi, isa-

russanik pissarsiniarneq ilanngullugu.

*Imm. 2.* Utoqqalinersialimmut Kalaallit Nunaata avataani aalajangersimasumik najugalimmut innarluuteqarnermut aamma peqqiilliuuteqarnermut tapit tunniunneqassanngilat.

*Imm. 3.* Innarluuteqarnermut aamma peqqiilliuuteqarnermut tapit pillugit Naalakkersuisut malittarisassanik ersarinnerusunik aalajangersaassapput.

### *Aningaasaqarnermut tapeq aamma saniatigut tapeq*

**§ 17.** Utoqqalinersialimmut aningaasaqarnikkut immikkut ittumik ajornartorsiuteqartumut imaluunniit utoqqalinersialik aningaasaqarnikkut annertuumik ajornartorsiuteqalernissaa ilimanaateqarpat aningaasaqarnermut tapeq tunniunneqarsinnaavoq.

*Imm. 2.* Aningaasaqarnermut tapeq, tak. imm. 1, utertillugu akileqquneqarsinnaavoq:

- 1) Illersorneqarsinnaanngitsumik aningaasanik aqutsinerlunneq pissutigalugu aningaasaqarnermut tapeq tunniunneqarpat, imaluunniit
- 2) Utoqqalinersiaqartoq aningaasaqarnermut tapinik pisartagaqartoq kingusinnerusukkut aningaasanik piffissamut pineqartumut aningaasaqarnermullu tapit assinganik siunertaqartumik pissarsisimappat.

*Imm. 3.* Utertillugit akileeqqusineq aatsaat piumasarineqarsinnaavoq utoqqalinersialimmut tapinik aningaasaliissuteqarnermut atatillugu utertitsisussaataitanermik ilisimatitsisoqarsimappat.

*Imm. 4.* Saniatigut tapeq aningaasaqarnermut tapiliunneqartut saniatigut tunniunneqarsinnaavoq aningaasartuutit aalajangersimasut akilereernerini utoqqalinersiallit aningaasat namminneq atorsinnaasaat pillugit kommunip minnerpaaffiliisimanera tunngavigalugu.

*Imm. 5.* Utoqqalinersialimmut Kalaallit Nunaata avataani aalajangersimasumik najugalimmut aningaasaqarnermut tapeq aamma saniatigut tapeq tunniunneqassanngilaq.

*Imm. 6.* Utoqqalinersiaqartut, tak. imm. 1, ukiumut ataasiarlutik najukkap angerlarsimaffigisap avataanut qanigisaminni toqusoqartillugu ilisoqarnerani peqataajartornissamut angalanermut aningaasartuutit matusserneqarnissaannut pisinnaatitaapput.

*Imm. 7.* Aningaasaqarnermut tapit aamma saniatigut tapit pillugit, aamma aningaasat nammineq atorsinnaasat ilanngullugit Naalakkersuisut malittarisassanik ersarinnerusunik aalajangersaassapput.

## **Kapitali 7**

### *Angerlarsimaffimmi ikiorteqarneq akeqanngitsoq*

**§ 18.** Utoqqalinersiaqartoq angerlarsimaffiminiiginnarsinnaappat angerlarsimaffimmi ikiorteqarnissamik pisariaqartitsisoqartillugu kommuni akeqanngitsumik innersuussisassaaq.

*Imm. 2.* Utoqqalinersialinnut angerlarsimaffimmi ikiorteqartarneq pillugu Naalakkersuisut malittarisassanik ersarinnerusunik aalajangersaasinnaapput.

## **Kapitali 8**

### *Aqutsineq*

§ 19. Inuit Kalaallit Nunaanni najugallit utoqqalinersianut tapiliussaasinnaasunullu qinnuteqaat kommunalbestyrelsimut tunniutissavaat.

*Imm. 2.* Inuit kommuneqarfiit killilersugaanerisa avataanni najugallit utoqqalinersianut tapiliussaasinnaasunullu qinnuteqaat Naalakkersuisunut tunniutissavaat.

*Imm. 3.* Isumaginninnikkut isumannaallisaaneq pillugu Nunat Avannarliit isumaqatigiisutaat naapertorlugu utoqqalinersianut qinnuteqaat Naalakkersuisunut tunniunneqassaaq.

*Imm. 4.* Inuup nammineerluni qinnuteqarsimangitsup utoqqalinersiaqalernissaa tapiliussaasinnaasullu pillugit kommunalbestyrelsi suliassamik aallartitsisinnaallunilu aalajangiisinnaavoq.

## **Kapitali 9**

### *Paasissutissiisussaatitaaneq aamma nakkutilliisussaatitaaneq*

§ 20. Utoqqalinersianik tapiliussaasinnaasullu ilanngullugit pisinnaatitaanermut imaluunniit nalimmassaasoqarnissaanut tunngasuni atugarisatigut allannguuteqartoqartillugu utoqqalinersiaqartoq kommunalbestyrelsimut paasissutissiinissaminut pisussaatitaavoq.

*Imm. 2.* Inuttut aningaasaqarnikkullu atugarisanik eqqunngitsumik paasissutissiisimanerup kinguneranik pissusissamisuunngitsumik utoqqalinersiaqartitsisoqarsimappat tapisiaqartitsisoqarsimappalluunniit, utoqqalinersiallillu ilisimasimappagu ilisimasariaqaraluarpaguluunniit pisussaatinneqartussaanani, aningaasat pisassarinnngisat utertillugit akilerneqarnissat piumasqaataasinnaavoq imaluunniit utoqqalinersianit ingerlaavartumik akilersorlugit ilanngaatigineqarsinnaallutik.

§ 21. Utoqqalinersianik tapisiaqartitsisinnaanermillu tunniussisarnermi kommunalbestyrelsi nakkutiginnissalluni pisussaatitaavoq.

## **Kapitali 10**

### *Tunniussisarneq*

§ 22. Utoqqalinersiat aamma tapiliunneqarsinnaasut tunniunneqartassapput qaammatikkaartumik siumoortumik.

§ 23. Utoqqalinersiallip aningaasaqarnerminik aqutsisinnaannginnera kommunalbestyrelsimiit missiliorneqarpat utoqqalinersianik tapiliunneqarsinnaasunillu pisartakkanik aqutsinissamik kommunalbestyrelsi aalajangiisinnaavoq.

*Imm. 2.* Imm. 1 malillugu aalajangiinerup kingunerissavaa utoqqalinersialinnut ataasiakkaanut malittarisassat suleriaatsillu nalinginnaasut saneqqullugit tunniussisarneq kommunip aalajangiiffigisinnaagaa, utoqqalinersialik sukkulluunniit aningaasartuutitut aalajangersimasunut aamma inuuniarnerup attatiinnarnissaanut naammattunik akissaqartissinnaaqqullugu.

§ 24. Utoqqalinersiaqarnissamut piumasaqaataasut eqquutsinneqarunnaarpata utoqqalinersiaqartitsineq qaammatip tulliuuttup naaneraniit unitsinneqassaaq. Kalaallit Nunaat qimallugu nuunnermi qaammatip nuuffiusup naanerani utoqqalinersiaqarneq unitsinneqassaaq, nunanut avannarlernut imaluunniit nunanut allanut EØS-imik isumaqatigiissuteqarsimasunut nuunnermi utoqqalinersiaqaannarnissamut piumasaqaatinik eqquutsitsisoqartoqartillugu eqqaas-sanngikkaanni.

*Imm. 2.* Utoqqalinersiallip maqaasineqarluni nalunaarutigineqarneraniit qaammatit pingasut qaangiunneranni uumaneralu uppersarsarneqarsinnaanngippat utoqqalinersiaqartitsineq qaammatip tulliuuttup aallaqqaataanit unitsinneqassaaq.

*Imm. 3.* Utoqqalinersiaqarneq atuukkunnaassaaq utoqqalinersiaqarnerup unitsinneqarneraniit ukiup ataatsip qaangiunnerani utoqqalinersialik suli uumanersoq uppersarsarneqarsinnaanngippat.

*Imm. 4.* Utoqqalinersiallip toqukkut qimagunneranut atatillugu § 5, imm.1 malillugu aappaqarsimappat, aapparisimasaanut utoqqalinersiat qammammi toqukkut qimaguffiusup naaneraniit qaammatit marluk tunniunneqassapput.

## **Kapitali 11**

### *Akiligassanngortitsisarneq*

§ 25. Utoqqalinersiat aamma tapiliunneqarsinnaasut akiligassanut allatulluunniit pingitsaalisaasumik akiliisitsiniarnermi pisortanut akiligassaqartoqartillugu taamaallaat attuumassuserneqarsinnaapput.

## **Kapitali 12**

### *Naammagittaalliuuteqarsinnaaneq*

§ 26. Inatsisartut inatsisaat manna malillugu aalajangiinerit Isumaginnittoqarfiup aqunneqarnera aaqqissuusaaneralu pillugit malittarisassat sukkulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

## **Kapitali 13**

### *Aningaasalersuineq naatsorsuuserinerlu*

§ 27. Utoqqalinersianut aamma meeqqanut tapinut aningaasartuutit 90 pct-ii Nunatta karsianit 10 pct-illu kommunimit aningaasartuutigineqassapput.

*Imm. 2.* Aningaasaqarnermut tapit aamma innarluuteqarnermut tapit kiisalu peqqiilliuuteqarnermut tapit kommunimit aningaasartuutigineqassapput.

*Imm. 3.* Utoqqalinersiat aamma tapiliunneqarsinnaasut kommunit agguarneqarsimanerisa avataani aalajangersimasumik najugalinnut aningaasartuutit Nunatta karsianit akilerneqartassapput.



*Imm. 4.* Utoqqalinersialinnut Kalaallit Nunaata, Qallunaat Nunaata imaluunniit Savalimmiut avataani aalajangersimasumik najugaqartunut utoqqalinersianut aningaasartuutit Nunatta karsianit akilerneqartassapput.

*Imm. 5.* Matumani Inatsisartut inatsisaanik aqutsinermut aningaasartuutit oqartussaasumit akisussaasumit akilerneqartassapput.

*Imm. 6.* Utoqqalinersialimmut angerlarsimaffimmi ikiorteqarneq kommunimit inner-suussutigineqartoq, tak. § 18, utoqqalinersialimmut akeqangilaq, aningaasartuutillu kommunimit akilerneqartassapput.

**§ 28.** Kommunit naatsorsuutinik saqqummiussisarnissaat kukkunersiuisarnissaallu pillugit malittarisassat ersarinnerusut Naalakkersuisunit aalajangersarneqarsinnaapput.

**§ 29.** Ukiup sisamararterutaata aamma ukiup ullorsiuteqarfiusup naanerata kingorna kingusinnerpaamik qaammat ataaseq qanngiutsinnagu kommunimi utoqqalinersiaqartut pillugit kisitsisitigut paasissutissat kommunip Naalakkersuisunit nalunaarutigissavai.

*Imm. 2.* Paasissutissat nalunaarutigineqartussat imarisassaat ilusilersorneqarnissaallu pillugit malittarisassat Naalakkersuisunit aalajangersarneqarsinnaapput.

**§ 30.** § 27-mi aningaasartuutit taaneqartunut Nunatta karsianit aningaasaliissutaasussat tamakkiisumik ilaannakortumilluunniit Naalakkersuisut unitsissinnaavaat, §§ 28-29 malillugu aalajangersakkat kommunimit naammassineqarsimanngippata.

*Imm. 2.* Inatsit una malillugu imm. 1 tungavigalugu Nunatta karsianit aningaasanik unitsitsineq innuttaasup ikiorsiissutinik pissarsinissamut pisinnaatitaaneranut sunniuteqartussaangilaq.

## **Kapitali 14**

### *Atortussanngortitsineq*

**§ 31.** Inatsisartut inatsisaat 1. januar 2016 atuutilerpoq.

*Imm. 2.* Peqatigisaanik utoqqalinermi pensionisiat pillugit Inatsisartut peqqussutaat nr. 3, 7. maj 2007-imeersoq kingornatigullu allannguutit ilanngullugit aamma Utoqqalinermi pensionisiat pillugit Namminersornerullutik Oqartussat nalunaarutaat nr. 14, 27. juni 2007-imeersoq atorunnaarsinneqarput.

*Namminersorlutik Oqartussat, ulloq xx.yy 2015*

Kim Kielsen